

永  
定  
河  
志

永定河志目錄

卷十一

奏議二

雍正元年  
至四年

永定河志卷十一

奏議二

雍正元年十月初二日北岸分司兼南岸分司蘇敏為欽奉

上諭事本年九月十九日奉兵部侍郎牛鈕傳

上諭永定河南岸分司雅思海這許多年每年花費錢糧並未加謹修理著革退分司將伊所侵欺著竭力自備在河工効力行走若効力好朕復起用若不効

力從重治罪北岸分司蘓敏兼理南岸分司事務南岸同知全寶兼北岸同知事務行走將所補北岸同知調來另行補用彼處筆帖式甚多交與分司酌量留用其餘放奏發回爾子鑾儀衛主事穆爾恭調補通州河工主事著不時巡查永定河工程鑾儀衛主事員缺著另行補人爾下旨與舅舅隆科多看爾子穆爾恭人去得明白可成就欽此臣查得永定河筆帖式二十員實屬過多

聖上所見甚明今欽遵將南岸筆帖式闕福德宗費揚  
阿哈什泰五十九岳林北岸筆帖式福壽常壽黃  
海席柱阿音達德勤此十二員留用將南岸筆帖  
式森忒赫巴勒永壽西柱北岸筆帖式七格溫拜  
常奇趙明此八員發回又查得永定一河古名無  
定平時水勢迅湍人力尚可支持時遇麥伏秋汛  
霖雨連綿舉凡谿澗之水莫不灌注於此河郭家  
務以上尚可容納自郭家務以下兩隄相去甚近

水被夾束愈加洶湧且渾水沙泥過半河身易淤而沙性之隄又復易潰故前任諳練河工之員每不能保其安瀾已蒙

聖上洞鑒臣蒙除授北岍分司方在晝夜惶懼恐不能稱其職守復蒙

皇上特旨著臣兼理南岍事務

隆恩擢用臣敏雖竭盡心力實不能報答但

欽工重大河性靡常更兼汛期水勢浩大不能往返過

渡倘有顧此失彼之虞在臣獲罪之事小而上負  
聖恩下害生民即萬死亦不足贖竊臣查得郭家務以  
下因河隄窄狹水勢洶湧凡有衝決俱在郭家務  
以下之處若值汛期水勢浩大臣一身不能週到  
惟賴分管人員看守此等人員必得家道殷實有  
能之人方能稱職以臣愚見自郭家務以上仍交  
現在畚工之福壽關福等看守照依舊例遵行外  
郭家務以下至柳岔口每岸分派三工將各部院

衙門家道殷實為人妥當之筆帖式揀選六員按  
旗出結送往河工令其看守兩岸六工若三年無  
過不論有無捐埽即行報部議叙以應陞之缺即  
補如有本身効力捐埽者則加倍議叙倘三年之  
內有衝決之處著落伊等家產賠補如此則看工  
官員自保家產奮力功名於河工大有裨益矣伏  
乞

聖上睿鑒交與該部揀選六人賞給俟此六人到工之



日將現在留工十二員內再行撥回六員為此不  
勝惶恐謹

奏請

旨本日奉

旨著吏部會同兵部侍郎牛鈕議奏欽此

雍正元年十月二十二日兵部侍郎牛鈕為欽奉

上諭事臣奉

旨主事穆爾恭巡查永定河隄工啟奏去後今穆爾恭

回來呈稱我復思永定河工程務將現有舊工丈尺得以明白後日新添修築工程之處方可查核率領分司蘇敏與同知全寶千總王鳳康等自盧溝橋起至柳岔口止丈量得南岸隄長共一百七十九里此內石隄二段共長三十一里有餘下埽工程六十六段共長八百七十七丈五尺鑲墊工程一百十段共長一千六百三十八丈七尺北岸隄長共一百八十五里此內沙隄長二十四里有

餘下埽工程三十九段共長四百七十八丈五尺  
鑲墊工程九十五段共長一千六百四丈二尺南  
北兩岸之隄相隔寬五十二丈至七百七十五丈  
不等河身寬十八丈至八十三丈不等隄內自水  
面至隄頂高五尺至一丈一尺不等隄外自隄底  
至隄頂高一丈一尺至一丈五尺不等以上所有  
之工程丈尺取分司用印細冊存案明年至興工  
之時我先看伊等物料不時加謹巡查工程俱已

完竣分司照例報明巡撫我對冊除去舊工將新  
添工程查核至南岸金門閘相近石隄舊河口亦  
不遠甚屬要工今被水刷壞甚屬危險相應作速  
保護修理已明白行文分司蘓敏等自盧溝橋至  
柳岔口止謹繪全河圖樣

奏

覽等因具呈前來臣看主事穆爾泰繪圖呈稱建築金  
門閘係

聖祖仁皇帝睿算將牝牛河清水引入抵擋渾水汕刷永定河河底深通初築之時牝牛河河身高永定河河身低清水由小清河易於入閘甚屬有益今已年久永定河河身淤塞反高於牝牛河河身清水不能流通金門閘又刷壞現在抵沖大溜之處甚屬危險此河係數百萬銀兩建築今金門閘如不堅固修理若此處沖決永定河全河之水復入舊河而河致遷移不但臨近州縣受害而先前之建

築俱屬空虛郭家務以下兩邊之隄現雖加高培  
厚錢糧亦屬糜費關係甚要牛鈕受

聖主之恩甚重稍有見處何敢不言臣欲會同巡撫李  
維鈞率領穆爾泰蘓敏親詣金門閘確勘相應作  
何堅固修理之處詳議具奏為此將穆爾泰繪圖  
一併謹敬

奏

覽請

旨奉

旨依議李維鈞著來工所爾等會看具奏欽此

雍正元年十一月初六日兵部侍郎牛鈕等為欽  
奉

上諭事臣在金門閘會同直隸巡撫李維鈞主事穆爾  
忝分司蘓敏查得金門閘現有舊埽甚屬單薄埽  
面上自三尺至七尺不等鑲墊修理舊埽外面添  
下埽二道金門閘東溜應建雞嘴壩一座周圍長

二十一丈尾寬六丈五尺雞嘴壩東溜頂冲相應  
護崖下長五十丈近水埽二道金門閘下溜之處  
接舊埽下長一丈順水埽二道以上應添之埽俱  
下埽高八尺埽面上鋪墊秫秸草柳枝高七尺墊  
土釘管心椿應新添築隄共一百九十丈頂寬二  
丈底寬五丈高六尺至一丈不等接新添築隄茅  
草營之處有舊大隄一段長四百五十丈此頂寬  
只六七尺不等底寬一丈三四尺不等高二三尺



不等甚屬單薄不堪今將此加高六七尺不等頂寬二丈底亦寬五丈加幫修築以上工程物料工價估筭需銀共五千六百十四兩九分七釐八毫所需銀兩於道庫給發分司蘓敏於年前全備物料所備物料令主事穆爾恭查看明春開凍蘓敏親身揀看堅固趨修工完報巡撫轉奏

聞又查得修築永定河工程並不用礮只將土沙堆至丈尺面上用石礮堅築隄土甚鬆或被風捲去或

被雨水刷溜水長至此易於蟄陷是以每年易致  
冲壞要堅固隄工全賴礮打築嗣後堅築隄工鋪  
土一尺溼水用鐵礮打築至七寸為此繪圖謹

奏

覽請

旨奉

旨好依議欽此

雍正元年十二月十九日兵部侍郎牛鈕為奏

聞事據臣看得永定河分司蘓敏主事穆爾泰呈稱永定河郭家務至柳岔口南北兩岸隄共長二萬六  
百丈其加高者遵照

欽差並直隸巡撫前奏自一尺至五尺不等估計其培  
厚者依照巡撫面諭不甚險者俱照舊式至險者  
加厚料估之丈尺估計再本年清涼寺漫溢之處  
雖經堵築猶恐未堅估計月隄一段長三百八十  
丈頂寬三丈底六丈高一丈一尺以上共需土五

十一萬八百七十方零連礮夫工價共需銀六萬  
七千五百六十二兩零等語查伊等呈送冊內估  
計之土方丈尺礮夫銀兩數目俱各相符並請動  
用道庫錢糧以便明春開凍及時興修等因分司  
蘓敏等業已咨明撫臣應俟該撫另行具

題請

旨外伏思

聖主軫念萬姓動帑加倍隄工關係重大應交與分

司蘓敏於明春開凍興工之時親行督修堅固行  
破務於雨水前趨修完竣仍令主事穆爾泰不時  
往來加謹巡查俟工完呈報到日臣同撫臣親詣  
隄工按冊查核倘丈尺不敷修築草率即行指名  
題叅著令賠修可也為此謹

奏奉

硃批知道了欽此

雍正二年六月十五日工部為欽奉

上諭事臣等會議得直隸巡撫李維鈞奏稱永定河隄岸業已動帑培修尚有淤塞之處應行挖挑自柳岔口起至王家園一帶內有淤塞河路高低不等共計一千一百丈估計工料銀三千三百三十兩有奇所需無多培修隄岸銀兩尚有節省儘足敷用當嚴飭挑挖深通使河水暢流查郭家務最為緊要第七工歷年受水衝刷尤為至險所修隄岸自應加培堅築今查勘隄根半係沙土幫築

沙土甚鬆豈能防護急湍即當飛行專管及分修  
各員另用膠土培築堅固至永定河兩岸一遇水  
漲湍急便難挽渡往來分司同知有統轄之責今  
兩岸歸并深慮一時兼顧不及可否照舊分設伏  
候

聖裁等因前來查先經兵部侍郎牛鈕奏稱柳岔口之  
處現在雖無淤塞但河勢不定如有淤塞之處兩  
分司確勘報於巡撫請

旨挑挖等因在案今該撫既稱柳岔口起至王家園一帶內有淤塞應行挑挖估計工料銀三千三百三十四兩零請於修隄節省銀內動用等語應如所請速行挑挖深通工完造冊具

題查核至郭家務第七工隄根該撫既稱係沙土幫築不能防護急溜今分司各員培築堅固等語應嚴飭專管及分修各員培築堅固以保無虞又疏稱永定河兩岸一遇水漲溜急便難挽渡往來分



司同知有統轄之責今兩岸歸并深慮一時兼顧不及可否照舊分設等語查北岸分司兼理南岸分司南岸同知兼理北岸同知係奉

諭旨令其兼理南北兩岸原未缺官况河工之要全在平日預為籌畫修築堅固不時巡查防護方於工程有濟半年以來並不議及今正值伏汛之時該撫題請照舊分設統轄分司同知明係預為推却之地倘水漲溜急耽誤工程雖多員亦屬無濟應

將該撫所請照舊分設之處毋庸議謹

題奉

旨依議欽此

雍正三年八月初五日工部為遵

旨秉公回奏事臣等議得直隸總督李維鈞疏稱雍正  
三年四月二十一日蒙

皇上發交條奏永定河一摺

諭臣秉公回奏欽此於五月十五日刑部員外郎覺羅

明壽到保欽遵

聖諭將河工利弊情節兩相講論謹將永定河工程應分別節省並治理各條分晰敬陳等因具題前來一該督疏稱原奏永定河每年險修雇夫等銀共三萬一千兩多有浮銷之款臣查永定河工錢糧歷年報銷原無一定有報銷二萬五六千兩者亦有報銷三萬三四千兩者其中豈無浮冒河員俸工無幾食用沾潤自荷

聖明洞鑒若照原奏節省則減去一半誠恐藉口工程  
單薄興起十萬八萬工程為此不敢過於節省議  
於上半年民夫銀內節省二千兩下半年民夫銀  
內節省一千兩共節省銀三千兩嗣後管工各員  
領銀若干兩辦料若干件務令報臣衙門委員驗  
看若分司同知發銀不實管工各員辦料不足臣  
即叅究等語查河工關係緊要若遽節省一半誠  
恐工程單薄但錢糧

國帑攸關雖云河員俸工無幾豈容任意浮銷抑且  
工程險易無定節省勢難畫一若遇平易工程豈  
止節省銀三千兩且河工向有先估後銷之例嗣  
後永定河如遇緊急險工一面動用料物興修一  
面將工程段落丈尺需用工料銀兩數目造冊具  
題其歲搶工程亦令先行題估工完之日造冊題  
銷至分司同知倘或發銀不實管工各員辦料不  
足有令具空領等弊該督即行查叅從重治罪一

該督疏稱原奏請停長墊名色一欵臣查各員領銀買料恐有冒開應將長墊一項停其報銷如遇水險工大購料不敷令其飛報臣衙門委官確查即於平易工程所備料物撥用等語查工程險易靡定料物自須預備以防急需但永定河素有平易工程預備料物其長墊銀兩理應不准報銷如水險工大飛報總督衙門委官查確即於平易工程所需預備物料撥用仍令具題工完之日核明

據實題銷其長墊名色永行停止報銷一該督疏  
稱原奏應行將河兵減去一半如遇下埽打樁之  
時即於節省餉銀內雇夫一款臣查永定河河兵  
原係二千名康熙四十年前任撫臣李光地題裁  
一千二百名每工揀存三十名現存八百名若遇  
工程緊急以裁兵餉銀臨時僱夫雖少節省但永  
定河兩岸共長三百五十餘里每工需人巡防今  
若再減一半恐鞭長莫及第河兵每有坐食之時

每工三十名似屬糜費應於八百名內減去二百名可節省銀二千八百餘兩若遇下埽打樁之時人不足用應行僱夫即於原撥僱夫銀七千兩內動用等語查永定河兩岸共長三百五十餘里每工現有河兵三十名應如該督所題於八百名內有老弱不力者減去二百名永定河兩岸工程險易不一應令該督將所存兵六百名照工段之險易撥兵防守仍將其工裁減若干之姓名於花名



清冊內分別造送報部若遇緊急工程人不足用  
另行僱夫即於原撥僱夫銀七千兩內動用仍造  
入估計冊內題報一該督疏稱原奏請按時價採  
買秫秸一欵臣查秫秸價值原無一定從前每束  
一分雖不甚貴然豐收價賤徒飽官橐歟歲價昂  
必致民累嗣後應照時價採買等語查秫秸價值  
固無一定然每束一分歷年已久且各處工程俱  
有定價若照時價採買誠恐任意低昂况原條陳

內秣秸每萬束價銀一百兩時價採買一萬束價銀不出五六十兩嗣後每束一分應減去三釐准其八釐永為定例應將該督照時價採買秣秸之處毋庸議一該督疏稱原奏裁撤筆帖式添設把總二款臣查筆帖式內原多假冒殷實希圖限滿即陞然分工防守多資効力若遽裁撤筆帖式添設把總不特有添俸薪之費且恐官卑力薄必致悞工今議得揀選筆帖式是否殷實必須本旗都

統出結報部則虛冒殷實之弊自絕等語臣部移  
查吏部回稱現今永定河筆帖式共十二員俟缺  
出時行文各部院衙門家道殷實情愿赴工効力  
者揀選發往等因嗣後遇有筆帖式缺出令各部  
院衙門揀選發往仍取該旗都統家道殷實印結  
如有希圖限滿即陞假冒家道殷實者該督查出  
即行指名題叅交與該部從重治罪並將揀選發  
往之上司出結該旗之都統叅領佐領驍騎校一

併交與該部議處一該督疏稱原奏埽壩皆指舊作新嗣後如鼠洞衝決該管人員治罪將款內節省銀兩委員估修冊報工部一款臣思分管人員遇鼠洞衝決若止治以罪不令賠補又恐膜視河工况衝決之處將款內節省銀兩估修則節省徒為悞工之員所費至委員修工完後復行報部委驗河員不無一番應酬嗣後或有鼠洞衝決應仍著該管之員依限賠修倘有指舊作新情弊即將

分管之員咨革責令失察之分司同知分賠等語  
查防守修過隄岸乃分管官員之專責如鼠洞衝  
決即著落該管官限日賠修如限內不完及修過  
工程不堅即將該管官即行叅革仍令賠修至分  
司同知有監察之責倘有指舊作新捏報情弊即  
將該管官叅革賠修仍令失察之分司同知公同  
分賠修理一該督疏稱原奏永定河下梢淤沙以  
致衝決請嗣後作何挑挖深濶一款臣查永定河

水勢激湍下梢一淤不能暢流必致衝決嗣後每  
歲水枯之後臣即委員會同分司在淤淺之處量  
地之遠近寬窄深淺共有若干工程應需銀幾何  
公同剗挖如式則水自暢流兩岸可保等語查河  
水衝決隄岸皆因下梢淤沙不能暢流之所致嗣  
後遇水枯之時即遴委熟練幹員會同分司確勘  
如有應挑之處即將工程丈尺所需銀數造冊具  
題仍將用過銀兩數目據實題銷倘有捏稱淤淺

希圖冒銷情弊該督即行查叅交與該部嚴加治罪一該督疏稱原奏委員查驗必違老成練達之員一欵嗣後揀選老成練達之員查驗務將利弊確查詳覆如有徇隱一併附叅等語查修過工程如不另委官員查看不無捏報情弊嗣後查勘做過工程該督務必遴委練達老成官員據實查看如有徇隱情弊一併題叅可也謹

題奉

永定河志卷十一  
旨依議欽此

雍正三年十二月 和碩怡親王大學士朱軾為  
敬陳水利等事欽惟我

皇上宵旰勤勞無刻不以民依為念茲因直隸偶被水  
澇截漕發倉多方軫恤被水窮民既皆得所猶

命臣等查勘各處情形興修水利務期一勞永逸所以  
為民生計至矣盡矣臣等雖才識淺陋敢不殫心  
竭力以求仰副



聖懷自出京至天津歷河間保定順天所屬州縣所至  
相度高下原委並諮訪地方耆老所有各處情形  
大畧謹為我

皇上陳之竊直隸之水總會於天津以達於海其經流  
有三自北來者為白河自南來者曰衛河而淀池  
之水貫乎白衛二河之間是為淀河白衛為漕艘  
通達之要津額設夫役錢糧責成河官分段歲修  
而統轄於河道直隸總督邇年以來白河安瀾無

汎溢之患惟飭河道官員加謹防護可保無虞衛  
 河發源河南之輝縣至山東臨清州與汶河合流  
 東下河身陡峻勢如建瓴德棣滄景以下春多澆  
 阻一遇伏秋暴漲不免衝潰泛溢查滄州之南有  
 磚河青縣之南有興濟河乃昔年分減衛水之故  
 道也今河形宛然閘石現存應請照舊疏通於往  
 時建閘之處築減水壩以洩衛河之漲又靜海縣  
 之權家口潰隄數丈衝溜成溝直接寬河東趨白

塘口入海河亦應就現在河形逐段開疏於決口築壩減水均於運河有盆白塘口入海之處舊有石閘二座磚河興濟二河之尾應開直河一道歸并白塘出口滂則開閘放水不惟可殺運河之漲而河東一帶積滂亦得藉以消洩且海潮自閘內逆流遇天時亢旱則引流灌溉溝洫通而水利溥滄青靜海天津數百里斥鹵之地盡為膏腴之壤矣至沿河隄工大半低薄應飭修築高厚仍令總

督將玩忽河官恭處以警將來此治衛河之大畧也至東西二淀跨雄霸等十餘州縣廣袤百餘里畿內六十餘河之水會於西淀經霸州之苑家口會同河合子牙永定二河之水匯為東淀益羣水之所潴蓄也數年以來霸雄等州縣各淀大半淤塞惟憑淀河數道通流一經暴漲不惟淀河旁溢為災凡上流諸水之入淀者皆衝突奔騰淋漓無際總緣東淀逼窄不能容納之故也故治直隸之水

必自淀始凡古淀之尚能存水者均應疏濬深廣  
並多開引河使淀淀相通其已淤為田疇者四面  
開渠中穿溝洫洫達於渠渠達於淀而以現在淀  
內之河身疏淪通暢為衆流之綱經緯條貫脈絡  
交通瀉而不竭蓄而不盈而後圩田種稻旱澇有  
備魚鼈蜃蛤荏蒲之生息日滋小民享淀池之利  
自必隨時經理不煩官吏之督責而淀可常治矣  
週淀舊有隄岸加修高厚無隄之處量度修築其

趙北苑家二口為東西二淀咽喉趙北口隄長七  
里現在板石橋共八座俱應陞高加濶並於易陽  
橋之南添設木橋一座隄身加高五六尺橋空各  
浚深丈餘每橋之下順水開河直貫柴伙淀而東  
范家口之北新開中亭河迂復淤塞應疏濬深廣  
其上流玉帶河對岸為十望河舊道應自張青口  
開通由老隄頭入中亭河會蘓家橋三岔口達於  
東淀庶咽喉無梗尾閘得舒可無衝溢之患矣子

牙永定二河以淀為壑淀廓而後河有歸亦必河  
治而後淀不壅此治二河之法所當熟計也子牙  
為滹漳下流清濁二漳發源山西至武安縣交漳  
口流經廣平正定而滹沱滏陽大陸之水會焉蔡  
沈禹貢注云唐人言漳水獨自達海請以為瀆可  
知天津歸海之水以子牙為正流其餘諸水皆附  
之以達於海者也夫以奔騰注海之勢遮之以數  
百里紆迴曲折之隄河身淤墊高於平地兩岸相

距不過數丈舊時支港岔流一槩堙塞欲其不衝  
不泛安可得乎考任邱舊誌子牙下流有清河夾  
河月河皆分子牙之流同趨於淀今宜尋求故道  
開決分注以緩奔放之勢永定河俗名渾河其源  
本不甚大所以遷徙無定者緣水濁泥多河底逐  
年淤高久之洪流壅滯必決向窪下之地其流既  
改故道遂堙蓋水性就下無定者正其所以有定  
也今應於每年水退之後挖去淤泥俾現在之河



形不致淤高庶保將來不復遷徙二河出口俱在  
淀之西淀之淤塞實由於此臣等面奉

上諭令引渾河別由一道此

聖謨遠照經久無弊之至計也今應自柳岔口引渾河  
北遶王慶坨之東北入淀子牙河現由王家口分  
為二股今應障其西流約束歸一兩河各依南北  
岸分道東流仍於淀內築隄使河自河而淀自淀  
河身務須深濬常使淀水高於河水仍設淺夫隨

時挑濬毋令淤塞兩河淀河之隄至三角淀而止  
蓋三角一淀為衆淀之歸宿容蓄廣而委輸疾但  
照舊開通逐年撈濬二河之濁流自不能為患而  
萬派之朝宗可得安瀾矣此廓清淀池調濟二河  
之大畧也再各處隄防衝潰甚多應俟隄內水洩  
興工修築其高陽河之柴淀口河身南徙舊河淤  
塞斷流應速挑濬復其故道新河之南界連任邱  
有古隄一道亦衝潰數段以致任邱西北村莊盡

被淹沒鄭州一帶通衢亦宛在水中現今任令詳  
請開挑淀隄消洩亦應俟水退之後照舊修築並  
墊高行路以便往來又新安之雹河自西折東遶  
縣治之南入淀而徐河會入漕河復自劉家莊泛  
濫而下新安正當二河之衝每遭漂沒之患應於  
三台村南開河一道引漕河之水會入雹河由縣  
之正北入應家淀南岸築隄以護縣治凡縣屬之  
大小澱淀俱可以圩田種樹甚為有益凡如此之

處不少尚須逐一查勘並天津海口京東

畿南等處統俟來春查明具

奏謹將勘過情形繪圖恭呈

御覽伏乞

皇上睿鑒指示臣等未敢擅便謹

奏欽奉

上諭

恭錄  
卷首

又敬陳京東水利竊河道有經有緯而緯常多於

經所以資節宣利挹注也臣等歷看京東之水若  
白河若薊若漙以及永平之灤河皆經流之最大  
者白河為漕運要津農田之蓄洩不與焉然河西  
曠野平原數十里內止有鳳河一道自南苑流出  
涓涓一帶蜿蜒而東至武清之堠上村斷流而河  
身淤為平陸此外別無行水之溝亦無瀦水之澤  
一有雨潦不但田廬瀰漫即運河隄岸亦宛在水  
中矣查涼水河源自京城西南由南苑出宏仁橋

至張家灣入運請於高各庄開河分流至堞上循  
鳳河故道疏濬由大河頭入仍於分流之處各建  
一閘以時啟閉庶積潦有歸且可沾溉田疇而於  
運道亦無碍也運河之東則香河其下為寶坻沿  
河隄岸坍塌屢為二邑之災應飭河官及時修築  
高厚並於牧牛屯以上斜築長隄一道以障上流  
之東溢則香河寶坻無運河之患矣再通州烟郊  
以南之水皆滙於窩頭分為二股一股南入運河

一股東流經香河縣之吳村匯於百家灣入七里屯達於寶坻查七里屯以上大半淤塞地皆沙鹵難以開鑿若將南流一股疏通深暢則窩頭經流歸於運河分入香河之吳村者無多稍加濬導則亦可免衝溢矣又夏店之箭杆河經香河東北入寶坻之溝頭河漫流入淀應從溝頭疏濬導流於寶坻城南會七里屯之水東入八門城達於大河庶水有攸歸不致漫溢為害且潮水自八門城逆

流入河於農田亦有利焉寶坻之西北壤接薊州  
薊州運河自三臺營諸山之水東南至寶邑會白  
龍港又南經玉田豐潤合漚水達於海河身深濶  
源遠流長所謂棄之則害用之則利者也臣等愚  
見請先築河隄務須高厚永保無虞然後於下倉  
以南建石橋一座橋空下閘壅水而升之注於兩  
岸以資灌溉多開溝洫自近而遠縱橫貫注用之  
不乏矣漚水又名還鄉河發源遷安之泉莊噴薄



洶湧懸壁而下既入平地則委折蛇行土人有三  
灣九曲之稱自康熙四十二年決運河頭奪流而  
西至雍正元年始塞決口挑引舊河然河道狹而  
隄堰卑東決則淹豐潤西決則淹玉田二邑士民  
請展狹為廣改曲為直其說近是然以建瓴之勢  
奔放直瀉恐下流益滋衝潰之患似應酌量於甚  
曲之處如劉欽莊王木匠莊各開直河一道其舊  
流亦無令壅塞俾得兩處分瀉隄堰之逼近河身

者拓而廣之更加高厚可無衝決之患至沿河一帶建閘開渠數十里內無非沃壤土人動言洩水急湍為患不知敗稼之洪濤即長稼之膏澤凡漬而為害者皆分而為利者也現在近河居民引流種菜千畦百隴在在皆然曾未見利於圃而有不利於農者也玉田本屬稻鄉藍泉河出藍山西南流入薊運夾河潑水為湖伏秋山水暴發河與湖平一望瀰漫應將河身疏通深廣束以隄防西北

另開小河一道引山澗汙漫之水入河下流使湖  
無泛濫而河得安瀾仍於曲河頭建閘開渠引水  
遶東湖而南令內外田地均沾灌溉仍於湖心最  
下之處圩為水櫃以濟泉水之不足其利可以萬  
全又泉河發源小泉山東流會孟家泉煖泉達於  
薊運河現在引流種稻所當搜滌泉源多方宣播  
以廣水利者也豐潤負山帶水湧地成泉疏流導  
河隨取而足志乘所謂潤澤豐美邑之得名匪虛

也臣等歷勘所至如城東之天宮寺牛鹿山鐵城  
坎以及沿河沮洳之處或疏泉或引河可種稻田  
數百畝多至千餘畝而止惟縣南接連大泊一帶  
平曠萬頃土膏滋潤內有王家河汊河龍堂灣泥  
河共四道皆混混源泉春夏不涸王家河汊河流  
入大泊龍堂灣泥河西入蘄運河而田疇不沾勻  
水之利為可惜也應請滌其源疏其流壩以壅之  
隄以蓄之東北引陡河為大渠橫貫四河而中間

多開溝洫度陌歷阡濼洫宣布數十里內取之左  
右皆逢其源滂則田水達於溝溝達於渠渠會於  
河河歸於大泊大泊廣八里長方十餘里若於東  
南穿河導入陡河以達於海而泊內可耕之田多  
矣陡河即館水源自灤州之館山東流遶縣境而  
南傍河村莊曰上稻地下稻地南曰官渠蓋昔年  
圩田種稻之處溝塍遺址尚有存者宣各莊以下  
至今稻田數百頃村農以此多致饒裕若推而廣

之泗河堅築隄防多設壩閘以時蓄洩疆理一循  
舊跡不勞區畫而兩岸良田不可數計至板橋狼  
窩舖等處東連榛子鎮一帶流泉大槩入灤州境  
矣灤州為永平屬邑永平之水灤河為大其源遠  
所從來者高洶湧滂沛推壅砂石既不可束以隄  
防亦難以資灌溉然各屬支流藉以滙歸故少漲  
溢之患而涓漑皆農田之資如灤州近城之別故  
河淤塞漫流數十年於茲若照舊疏通不惟城闈

不受侵囓而西南負郭之田皆收浸潤之利城南  
則有龍溪出五子山東大泉騰沸流至五官營伏  
入地中至閻家莊復見即清河之源也城西則有  
泥河經芥菜山南流折而東又轉而南二河之間  
地勢平行土岡環之東南一望無際皆可播流而  
溉也西南則游觀莊之靳家黃坨河引泉可田南  
則稻河吳家龍堂等處引河可田西北則自沙河  
驛之東榛子鎮之西龍溪黃崖煖泉會於牯牛河

經雙橋而圍山瀑水入之流清而駛地平而潤沿岸一帶建壩開溝無處非水耕火耨之地矣灤州之北為遷安城北徐流營湧出五泉合流入桃林河又三里橋湧泉流出灤河蠶姑廟泉河與灤河相接龍王廟之泉頭流為三里河經十里橋而南夾河皆可田黃山之麓一泓湛然浮沫如珠西漾入石渠渠岸清泉噴湧即還鄉河所自出也自泉莊至新集五六里兩岸地與水平播之可種稻田



百餘頃且可分還鄉河上流之勢灤河經府治之  
西青龍河會焉青龍河即盧水縣以此得名境內  
岡巒起伏地高水深難以引汲惟縣北之燕河營  
湧泉成河及營東五泉漫溢四出至張家莊一帶  
皆可挹取為樹藝之地他如撫寧昌黎樂亭以及  
遵化三河等州縣臣等未及徧歷然按圖考誌大  
抵水澤之利居多伏念京東土壤膏腴甲於天下  
祇緣積俗怠玩苟且因循人有遺力地有遺利我

皇上軫念民瘼宵旰勤求無刻或釋臣奉

命查勘所至宣揚

聖德明白曉諭一時民情踴躍歡聲雷動今春融凍解  
正動工修築之時臣等分遣効力人員逐一確估

請

旨興工惟是工程浩大地方遼濶臣等欽遵

聖諭殫心籌畫所勘情形大概如此至高下廣狹隨宜  
酌量容有變通之處抑或委員經理未必盡合機

宜圩田之多寡奏效之遲速統俟工完彙齊造冊  
將勘過情形繪圖恭呈

御覽伏乞

皇上睿鑒施行

又敬陳

畿輔西南水利疏伏查京西一帶諸山實維太行之  
麓逶迤環拱遙衛

神京水勢因之盡朝宗而左鶩故自西北山而下者

皆東南滙於兩淀自西南山而下者皆東北滙於  
大陸二泊兩道分流畢由東淀達直沽入海則是  
今日所歷諸河即去冬查勘

畿南河淀之上流也下流治乃可以導上流之歸亦  
必上流清乃可以分下流之勢此相須而不可偏  
廢者謹將勘過情形並開挖疏引措置水田事宜  
為我

皇上敬陳之盧溝以西諸水拒馬其鉅流也發源山西

廣昌之涑山東流至房山鐵鎖崖分為二派一派  
東入涑州過新城西南一派南入涑水經定興歷  
楊村而東二派合流而為白溝河他若挾河琉璃  
河會於馬頭村為馬頭河茨尾河廣陽水會於石  
羊村為牝牛河白玉塘西域寺甘池諸泉會為胡  
良河皆入焉馬頭牝牛二河雨多則溢雨少則涸  
均難資其灌溉而牝牛一河又往往東決為固霸  
諸邑害衝溜既久宛成河槽特以下無所歸以致

泛濫田野應加疏濬，導自高橋以下入淀，不惟固  
霸百里之內，滂水有所歸，攝兼可減白溝之流，免  
雄縣淹沒之患矣。惟胡良所經地，稱膏腴，溝渠圩  
岸，宛若江南，擴而廣之，房涿之間，皆稻鄉也。涑水  
一派石亭赤土，樓村杭稻最盛，而房之張坊至駱  
家莊、涿之高村及城之西北一路，分渠引流，具有  
條理。又有王家莊、茂林莊、毛家屯等村溝渠，現存  
改為旱田者約百餘頃，詢之土人，僉言水之入涑

者七八房涿者三故不足用及訪涑則又以水源  
微弱為辭此皆小民狃於因循不足深信此河下  
流為白溝水勢甚盛而附流之茨尾等河常若涸  
竭則今之滔滔南下者孰非拒馬之餘波乎未有  
下流盛而上源微者今應於房山鐵鎖崖分流之  
處深溝側注以均其來白溝之上相地建閘以節  
其去不惟王家茂林等處之百餘頃復為水田且  
河流所經之定興新城等縣亦沾澆溉之利矣拒

馬之南為三易水曰濡曰武曰電案宇記所謂易水有三其源各出者也濡水出州北之窮獨山西折而南流環城東注又南入定興與涑水合流源泉白楊虎眼梁村馬跑諸泉及道欄河皆入焉源泉舊有石壩乃前人壅水開渠之遺址沿流建閘石基尚存故當時近水皆稻梁遠城皆荷芟今皆荒廢所應修復以廣水利者也武水出武峯嶺女思澗子莊溪潦水入焉流經定興合濡水而歸河



陽渡電水出石獸岡灌河入焉流經安肅合鹽臺  
陂而入安州之依城河三水俱挾原泉分流疏渠  
其勢甚便鍾家莊唐湖川鹽臺陂民皆藝稻是在  
因地擴充務使水無遺利電水之南曰徐水來自  
五迴嶺經滿城至安肅而曹水會焉合一畝方順  
龍泉諸水滙為依城河安州宛在水中其勢甚危  
前

奏引曹入電引電入淀順而導之正所以分而減之

也一畝泉出滿城東南湧地噴珠澄泓盈溢餘小  
泉以百畝雞距紅花名最著土人溉稻可十餘頃  
而水力已殫矣流經清苑城南為清苑河方順水  
即曲遂河祁水之下流也源出完縣之伊祁山五  
雲石穴二泉流為放水河蒲水伏流復現為五郎  
河皆會焉流經清苑之東為石橋河九龍泉出慶  
都城東繞城而流東北入方順水源盛而水饒疏  
而引之不可勝用也放水河之西有滄水發源山

西之靈邱由倒馬關入唐縣為唐河橫水自西北  
來會居民引以溉稻直達下素町畦相望經曲陽  
之鎮里高門所溉尤多南入定州而白龍泉復來  
會之主耨張謙等村傍河皆圩岸也應推廣以極  
水力所得稻田難以頃畝計矣又考完縣舊志前  
明曾於唐之北洛開渠引入放水河二邑均賴其  
利今河跡尚存當挖濬以復其舊而北洛之南原  
有騰橋一座以防山水之衝亦應訪其制而多設

之唐河之南有沙河來自山西之繁峙至白坡頭  
口入曲陽界合平陽河南流阜平當城胭脂二河  
行唐之部河咸會焉其上流亦名泝水經新樂歷  
定州沿流多資灌溉宕城鴉窩產德北川南川皆  
其處也他如阜平之崔家營行唐之龍岡甘泉河  
新樂之何家莊浴河俱有水田而泉渠頗多堙廢  
徧行疏滌所獲尤多沙河之南有滋河源自山西  
杖回山經靈壽為慈水七祖寨岔頭錦繡大明川

壅流皆可田入行唐之張茂村伏焉至無極南孟  
社而復出遶縣治北旋經深澤之龍泉涸沃仁橋  
疏流成渠皆天然水利也三水頗稱鉅流畢會於  
祁州之三岔口下為潞龍河往往泛溢為害去歲  
決柴淀口浸及任邱者即此水也以上諸水會於  
白溝者七會於依城河者十有六會於三岔口者  
十有一而盡攝於西淀焉自此而南水之載在圖  
經者二十有一惟滹沱最大發源山西繁峙之泰

戲山由雁門入直隸之平山界治河綿曼嵩陽雷  
溝沕沕水等河皆入焉治河一名甘陶河源自山  
西平定州松嶺流至平山初不與滹沱相通自二  
水合流而滹沱之勢遂猛屢奔潰為正定害元時  
引闢冶河自作一流滹沱水退十之三四已而治  
河淤塞復入滹河歲有潰決之患皇慶中議復之  
而未果又按漢書地理志治水即太白渠也受綿  
曼水東南至下曲陽入於汶此治之故道本與汶

合今應於入滹之處塞而斷之循其故流加以挖  
濬引入汶河則滹沱之猛可減此前人已試之成  
功也汶河發源獲鹿之蓮花營洛北村二泉其源  
頗有堙塞至灤城西南合北沙河而流始漸大澆  
溉可資但苦岸高難以升引應作壩以壅之俾水  
與岸平開渠二三尺縱橫俱可流通涓滴皆為我  
用矣伏秋水漲則決壩以洩之旱澇無虞萬全之  
利也汶河下流自寧晉入泊舊有石閘三座遺跡

尚存現在兩岸居民尚岸水以澆畦麥其為水利  
之用亦可想見矣汶河以南水自贊皇來者有槐  
水午水自臨城來者有涕水泥河泚河沙河自內  
邱來者有李陽河七里河小馬河柳河或名在而  
迹已埋或源在而流已徙道途所經一一訪求即  
土人亦不能言其故而指其處然石橋宛在斷碣  
猶存或此等本非恒流前人開之為洩滂歸泊之  
路今皆任民耕種以致山水暴下瀾漫四野貪尺



寸之利貽害無窮今已委員查勘酌量疏通令漫  
水有歸田疇不受其害小柳河之東為聖水井一  
名聖女河源出任縣之灤村聖女祠下源從地湧  
引流可田南為白馬河源出內邱之鵲山經邢臺  
居民建閘溉田壅之而不使下下流遂堙水漲之  
時則以隣為壑故北之聖女南之牛尾二河俱被  
其衝突為任邑害今應濬白馬入洎之流嚴邢臺  
閉閘之禁害去而利可興矣牛尾河發源於邢臺

之達活泉水盛岸高直達於任縣泊作閘節宣利  
賴曷窮矣又南為百泉河源出邢臺之風門山亦  
名七里河歷南和之北豆村康家莊等處有閘十  
三座溉田數百頃而任縣不沾一勺之潤今應立  
法以均其利自下而上各以三日為期則沿流一  
帶皆水田也但河身尚隘宜展而倍之百泉之南  
為野河源出邢臺之西山下經野河村入沙河沙  
河源出山西遼州之湫水流至沙河縣南分為二

支一流南和至任縣為澧河一流永年北下雞澤  
至南和為乾河抵任縣合洺河入任縣治沙河縣  
之普潤閘溉田四十餘頃者是其利也洺河亦發  
源於遼州歷河南之武安而入直隸永年縣過雞  
澤南和下與沙河合近年常苦涸竭若引滏陽之  
水假沙洺之道兩河之間俱可沾其浸溉滏陽河  
諸水之鉅流也源出河南磁州之神麇山至邯鄲  
南會渚沁二水流永年縣抵曲周過雞澤平鄉任

縣隆平至寧晉貫大泊而出抵冀州與滹沱水合  
所經之處疏渠灌稻元臣郭守敬曾言可灌田三  
千頃而明臣高汝行朱泰等建惠民等八閘民以  
殷富近為磁州之民築壩截流八閘已廢其六今  
應均平水利照舊修復其措置磁州一節容臣另

摺具

奏以上諸水入任縣泊者十八寧晉泊者十二則此  
二泊固二十餘河之委匯也查任縣泊土人謂之

南泊寧晉泊土人謂之北泊皆禹貢大陸澤故地也南泊所受諸水舊注滏河自滹漳闡於河高於泊所有出水五溝勢成倒灌難以議開惟雞爪一河不足消前泊之漲此任民所以嘵嘵於穆家口之開塞也隆平地居二泊之間惟恐坐受其浸故力爭而阻之及委員查勘穆家口河道原自流通特隘而淺耳今應畧加疏濬為力無多其邢家灣及王甫隄舊橋卑壞不無梗塞亦應改建添設以

暢其流而馬家店以下所有之澧河古隄畧為修補以防漫溢任民既不苦於漂沉即墜民何憂波及也北泊週圍百里地窪水深亦恃溢河為宣洩之路自漚沱南徙由賈家口灌入故道漸湮遂決汲口營上等村而東注但水口河身亦多淺隘今應大加展挖務俾寬深如此則南泊之水歸穆家口而咽喉已通北泊之水入滄陽河而尾閘亦快積滂日消舊岸漸復四圍涸出之地尚可以數計

哉然後作小隄以繞之多開斗門疏渠種稻則沮  
洳之場皆樂土也惟潯沱一河源連流長獨行赴  
海而善決善淤遷徙靡常自古患之向入寧晉泊  
則泊淤泊淤則衆流無所容納永定河之淤勝芳  
其明証也自去年北徙決州頭而東直趨東鹿奔  
軼四出至今尚未歸槽田廬俱被衝壓東邑官民  
請疏入泊之道以紓切己之憂然此道本無正流  
闡淤已成平地旋加挖掘工費甚繁且大陸古澤

泉流委注之地亦不應聽淤塞也今查有乾河一道係潯沱入溢舊路由木邱至焦岡河槽現在修治不難為力自張岔開挖六七里便可直接決河從此改流由焦岡而入溢水沛然而東寧晉泊既遠淤塞之害即東鹿深州等處亦無衝潰之患矣畿南州縣地方遼濶臣等未及徧歷者已遣効力人員悉心經理即當酌量緩急次第興工以仰副我皇上愛養民生興修水利之至意可也謹將勘過情形



繪圖恭呈

御覽伏乞

皇上睿鑒施行 臣未敢擅便謹

奏

謹按雍正四年永定河改移下口由王慶坨入三角淀達津歸海惟鳳河下游與永定河會流入大清河京西南諸水則皆不與永定河會流所謂河自河而定自定也然治水必覽全局怡賢親王陳奏直省水利綱舉目張條分縷晰經畫悉協機宜雖水不與永定河會流而情形自相表裏是以備登諸疏以昭法守

雍正四年正月初三日 和碩怡親王等議覆永  
定河南北岸分司覺羅明壽

奏稱奴才荷蒙

聖主隆恩擢用河員惟有盡心竭力仰報於萬一耳前

奴才謝

恩時蒙

皇上召入奴才口奏永定河郭家務以下河身歷年淤  
塞或可改寬另築一隄庶免衝決之虞隨蒙

皇上面諭朕著怡親王朱軾查勘直隸通省河道俟到  
永定河時爾將情形告訴伊等回京具奏欽此仰  
見我

皇上重念民生之至意極為廣大周詳本年十二月內  
怡親王大學士朱軾到永定河查勘情形細為  
籌畫如由永定河下梢柳岔口出水恐於子牙溝  
沱等河下梢有碍意欲自柳岔口改至王慶坨另  
築一隄庶河身寬展兼可出水不惟於永定河有

河渠志卷十一  
益且與子牙等河下梢不致淤塞則臨河百姓永

沾

皇恩其應改築之處除怡親王大學士朱軾具奏外再

奴才更有請者謹將河務緊要之處共列四款恭

呈

御覽等因雍正三年十二月二十六日

奏奉

旨交與怡親王朱軾議奏欽此欽遵臣等議得據永定

河分司覺羅明壽奏稱永定河金門閘一帶向有石隄二十五里自建設以來每遇河水汕刷上重下塌多致傾圮若照依石隄式樣重為修理不惟錢糧浩大抑且沙隄難堅可否將此石隄改作土隄加高培厚可無傾圮之慮等語查金門閘一帶河身俱係沙底石工浮砌易致坍塌每年修築徒費錢糧應如所奏將石隄改作土堤但永定河水勢迅激所築隄身務須加高培厚方可永久其舊

有隄石於緊要工程應用之處奏明移用又奏稱  
今歲鹹厥漫口並王家灣旱口一帶工程雖係賠  
修報完但工程單薄難以持久此緊要之地若不  
另為加修明春汛發難保無虞可否動用錢糧加  
修或仍令賠修之處相應請

旨定奪等語查隄工關係緊要據奏賠修官項雖經報  
完而工程單薄難以持久應速令該分司動用錢  
糧及時修築務期堅固以保無虞又奏稱兩岸看

工人員原設筆帖式二十員後裁去九員若柳岔口改至王慶坨添設隄岸工多人少未免顧此失彼除現在十一員外可否添補九員如揀選筆帖式保送家道殷實難得其人或將因公呈誤降革人員無論滿漢情願効力者交部揀選酌其年限派往河工効力無過准其開復以補原數則人才鼓舞河務亦有責成等語查河工設員關係緊要容臣等將所看過通省河道計議設官分治之處

具

奏請

旨應將該分司所請揀選人員之處毋庸議又奏稱臨  
河州縣俱有河防之責而辦料僱夫恐有膜視工  
程以蹈貽悞之弊况查舊例臨河村莊每遇五六  
七月發水之時各州縣免其徭役協護隄工而臨河  
居民俱念切田禾廬舍是以防護甚力請飭令臨  
河州縣皆當仰體



欽工重大辦料催夫無容怠緩又於五六月發水之時各州縣曉諭百姓暫免徭役同心協力防護隄工不惟河防大有裨益而亦深愜民情等語查每年河水汛發之時沿河州縣督率村莊百姓協力防護既有定例則五六月正當伏汛更宜加謹至於辦料催夫沿河官員均有責成應如所奏嚴行該督撫轉飭地方各官凡關係河工需用夫料務須上緊催辦如管河等官有短價勒買及畱難

捐勒之弊許地方官詳報總督題咨至發水之時  
預行曉諭臨河附近村莊免其徭役督率防護毋  
致疎虞倘有膜視工程借端推諉以及侵漁科派  
等弊查出將該地方官員從重議處恭候

命下臣等遵奉施行謹

奏奉

旨鹹廠黃家灣工程著照所奏一面動用錢糧及時修  
築完固其蘓敏應否賠修之處著明壽確議具奏再

賠修之例甚屬無益從來河官領帑修工必預留賠  
修地步以致錢糧不歸實用工程斷難堅固即幸而  
得保無虞而錢糧終歸入己似此積弊相習成風必  
照侵欺錢糧例嚴加治罪方足示懲著九卿詳議具  
奏餘依議欽此

雍正四年 和碩怡賢親王為請定考核之例以  
專責成事竊為政之經厚生為大愛民之道察吏  
為先我

皇上宵衣旰食軫念民依不惜數百萬帑金以錫兆

民之福

特命臣等疏濬水澤營治稻田開萬世永賴之美利臣

等仰遵

聖訓隨地經畫陸續興修所有本年完過工程派委大員勘明如式者例應交地方官收管雍正四年二月內臣等

奏請各處水田溝洫必須每年經理令管河各道督

率所屬州縣按時修浚定為考成等語經九卿議覆奉

旨依議速行欽遵在案今工員現在調回工程暫交州縣但考成未有定例即河道無憑舉劾請嗣後

計典將水利營田事實逐一開注由河道結送督撫以定優劣果能實心奉行著有成效者該督撫不時薦舉其或因循怠惰致悞工程查明即行

題叅至該道職司表率責任匪輕凡所屬地方水利

營田之興廢即該道奉職之優劣作何一併分別  
澄叙之處懇乞

皇上勅部議覆施行抑臣等更有請者直隸農民苦於  
旱澇其於種植之方多所未違今蒙

皇恩修舉水利旱澇無虞則地利宜盡除稻粱麥黍隨  
宜播種外其有畸零閒曠之地不能播種五穀者  
俱宜種植樹木或薪或菜利用無窮至各處河隄  
栽種柳樹既可保護隄根亦可資民樵爨尤為有

益臣等稽諸往古凡言燕地之產者俱云魚鹽棗栗之饒現今行視京東永平府一帶地方其民種植棗栗所在成林果實所收買遠邇夫土性不甚相殊而樹藝不能皆一雖百姓之勤惰不齊亦有司之勸相未力嗣後請著為例訓飭農民凡一村一坊之地務令種樹若干地方官不時查察因其勤惰分別獎懲將種過樹若干造冊報明本管上司不時查視再水泉之利既興凡陂塘淀澤俱

可種植菱藕蓄養魚鳧其利尤溥如此則地無遺  
利家有餘財吏治修而民生厚

畿輔之蒼赤共沐高厚之

皇仁矣是否可行臣等未敢擅便伏乞

皇上睿鑒施行奉

旨九卿會議具奏欽此

雍正四年二月十一日 和碩怡親王大學士朱

軾



奏為請設河道官員以專責成事竊臣等奉

旨查修水利遍視諸河隄岸坍塌河身淤塞蓋由事權不一稽核難周統轄於總河者既有遙制之艱專隸於分司者不無因循之弊以致錢糧不歸實用工程止飾目前沖決泛溢率由於此臣等愚見以為直隸之河宜分為四局南運河與減家橋以下之子牙河苑家口以東之淀河為一局應設一道員總理查天津道駐劄天津州與二河相近控制

甚便舊有天津同知泊頭通判以及各地方管河同知通判州判縣丞主簿等員悉令受其統轄永定河為一局應設河道一員總理永定河舊有分司及部發効力筆帖式此等人員既非地方專官則於民事漠不相關採買收受未免胥役掇累而該州縣之於分司體有尊卑權無統轄即分司實心任事亦呼應不靈請將永定分司改為河道駐劄固安縣總理永定河事務其沿河州縣各添州

判縣丞主簿等官以資防守所有同知一員照舊  
管理將向來効力人員一槩發回則地方既有專  
管工程必無貽悞其北運河為一局舊設分司亦  
應撤回一切河務令通水道就近兼轄其管河州  
判等官俱聽統轄又苑家口以西各淀及

畿南諸河綿亘地方五六百里經由州縣二十餘處  
亦應為一局目今疏通挖挑計費不貲若不特設  
大員統理恐工程旋修旋廢請將大名道改為清

河道移駐保定府

畿南諸河其管河同知通判州判縣丞主簿等員舊  
聽管轄至天津道衙門向來止管河間一府大名  
道止管廣大二府所屬州縣錢糧命盜案件原聽  
直隸藩臬稽核考成道員甚屬閒冗今既定為河  
道專管應將所屬州縣事務總歸知府考成省無  
益之繁牘勵有用之精神而河道事務可以悉心  
料理矣至通水道所屬除永平一府應不屬道轄

外通州等八州縣原無知府統轄該道有稽查錢糧之責應令照舊管理再各河道除錢糧舊有歲修之處仍照舊額設外其從來未設有錢糧與雖設錢糧而不敷修理者應酌議增設分貯各道庫內以憑給發其各處水田溝洫必須每年經理應令各道員督率所屬州縣印官按時修濬定為考成其道員錢糧有無虛冒工程有無修廢皆歸直督考核如此則事權一而呼應靈

國計民生均有裨益抑臣更有請者立法方始慮善  
宜詳凡茲河道之員必久任熟練方於工程有益  
其河道大員應聽直督揀選具題引

見簡用同知以下各員俱令照南河例總於河工員內  
揀補則人皆熟悉事宜即丞簿微員亦有遠到之  
望無不砥礪職守以奮功名且官既久任吏皆習  
慣駕輕就熟人人為知河之人百世享平成之利  
矣是否可行伏乞

皇上勅下九卿議覆施行

九卿議覆臣等查水利所關最重河道貴有專官  
我

皇上軫念直隸地方

特命 怡親王興修水利遍閱諸河凡有應加疏濬修  
築之處現在逐一興工若不特設專官工程難以  
稽核應如怡親王等所請直隸之河分為四局南  
運河與減家橋以下之子牙河苑家口以東之淀

河為一局令天津道就近管理其舊有天津同知  
泊頭通判以及各地方管河同知通判州判縣丞  
主簿等員悉受其統轄永定河為一局將永定河  
分司改為河道駐劄固安縣總理永定河事務其  
沿河州縣各添設州判縣丞主簿等員以資分防  
所有同知一員照舊管理將向來効力人員一槩  
撤回其北運河為一局舊有分司亦應撤回令通  
水道就近兼轄其管河州判等官悉聽統轄苑家



口以西各淀池及京南諸河為一局將大名道改為清河道移駐保定府舊有管河同知通判州判縣丞主簿等員悉聽統轄至天津道大名道今既為河道所屬州縣錢糧命盜事務應准總歸知府考成通水道所屬永平一府亦准不屬道轄其通州等八州縣原無知府統轄應仍令該道稽察錢糧照舊兼理其各處水田溝洫必須每年經理令各道員督率所屬州縣按地修濬定為考成道員

錢糧有無虛冒工程有無修廢悉歸直隸總督考

核各管河道庫存貯錢糧查永定河分司今改為

河道駐劄固安應將永定河歲修銀一萬五千兩

仍照額設解送河道外其通永大名天津三道亦

應照此例每年於司庫地丁錢糧各撥給銀一萬

五千兩存貯道庫以為修理河道之用倘有不敷

再行題請撥給仍於年終照例題報工部再查通

水道現在存貯丁字沽稅銀九千三百六十五兩

五分二釐零應於司庫撥給銀五千六百三十五兩零補足一萬五千之數又所設河道必得諳練河務方於工程有益亦應如 怡親王所奏令直隸總督揀選具題引

見簡用其直隸管河同知以下各官並現今添設之州判縣丞主簿等官總令直隸總督於河員內揀選題補其沿河州縣應添人員並各道分隸河員數目應令該督逐一查明分晰造冊報部至永定河

分司改為河道駐劄固安縣大名道移駐保定府  
及添設州判縣丞主簿等官衙署胥役應否添益  
增設之處亦令直隸總督詳議報部到日再議其  
各官應給關防俟該督擬定字樣報部鑄給再查  
直隸有管河同知州判縣丞主簿係吏部銓補之  
缺三年俸滿報部即陞今吏部應停止銓選嗣後  
缺出令直隸總督於河工員內揀選題補其各員  
陞轉亦比照南河之例令直隸總督保題陞補可

也謹

奏奉

旨依議速行欽此

又議覆總督管理直隸巡撫事務李維鈞題前事  
雍正四年八月三十日奉

旨怡親王議奏欽此議得直隸河道向無專員管理以  
致事權不一稽核難周經臣等合詞

奏請添設河員欽蒙

皇上勅下九卿議覆將天津通永大名三道並永定河分司俱改為河道仍令直隸督臣將應添管河各員並分隸各道之處以及衙署關防字樣逐一詳加擬議等因奉

旨依議欽遵行文在案今據該督疏稱除舊有河員仍循舊例及懸缺未補之河間府河捕同知泊頭通判景州州判霸州州判故城縣縣丞交河縣主簿青縣主簿靜海縣主簿香河縣主簿等九員已經

委員署理無容置議外其天津道一局河務殷繁請添設天津州州同青縣主簿苑家口清河道判文安縣縣丞共四員等語查天津為河淀交會之巨浸青縣有分洩子牙之新河均關緊要需員料理應如所請添設天津州州同一員青縣子牙河主簿一員至於天津局所管之清河舊屬河間府河捕同知管轄應將三角淀一帶淀池就近歸并該同知管轄文安縣止有

欽隄一道舊設主簿足資防汛其苑家口添設通判文  
安縣添設縣丞之處均無庸議又該督疏稱永定  
河道一局請將沿河涿霸二州各設州判一員吏  
目一員宛平良鄉固安東安永清武清等縣各設  
縣丞一員主簿一員共十六員更請復設同知一  
員仍留千把總四員等語查永定河分司改為河  
道其沿河州縣各添設縣丞主簿等官以資分防  
所有同知一員照舊管理將向來効力人員一槩



撤回前經九卿於雍正四年二月內議覆奉

旨依議欽遵在案應如所請永定沿河州縣八處共設  
河官十六員以足現在筆帖式十二員千把總四  
員之數即將現設河兵分隸各員以資防守其原  
有千把總官四員不便仍留河工相應行令該督  
分別咨咨回部推補至請復設北岸同知之處查  
永定河南北兩岸原係分司二員是以亦設同知  
二員分理後因兩岸歸并分司一員管理故將同

知裁去一員今分司已改河道兼管兩岸所有同  
知一員亦應兼管兩岸况九卿原議同知一員照  
舊管理之處甚明應將所請復設北岸同知之處  
亦無庸議又稱通水道屬運河向無專責董理應  
設同知通判各一員兩岸除武清縣原設河西務  
管河主簿一員外其通州分防滌縣州判一員武  
清縣分防楊村縣丞一員俱近在河干應令兼管  
河務東岸香河縣原設主簿一員再於要兒渡添

設縣丞一員東楊村添設主簿一員再薊州灤州  
各設州判一員玉田縣添設縣丞一員豐潤縣添  
設主簿一員共添八員等語查通水道屬運河關  
係漕運應如所請添設同知通判各一員董理其  
事其西岸河務令灤縣州判楊村縣丞就近兼管  
再添設要兒渡縣丞一員東楊村主簿一員專司  
東岸而更令西岸之楊村縣丞兼管鳳河東岸之  
楊村主簿兼管筐兒港以至蹋河洵其於水利亦

屬有益再查京東一帶水利營田工程甚多需人  
防守亦應如所請薊州灤州添設州判各一員又  
玉田縣添設縣丞一員豐潤縣添設主簿一員以  
資分理至於清河道屬該督疏稱舊設河員已足  
敷用惟於苑家口天津清河二道分界之處添設  
雄縣主簿一員分轄苑家口以西地方並料理趙  
北口西淀池事務等語查苑家口以西霸州地方  
與保定縣接壤其距雄縣頗為遙遠且苑家口以

西善來營一帶隄工又有霸保文大四州縣分修  
工段若以隔屬微員遙領其事未免呼應不靈應  
將該督所請添設雄縣主簿之處改為霸州清河  
吏目庶幾名實相當易於料理更將此添設吏目  
與霸州迤西之保定縣舊設主簿俱歸保定府管  
河同知統轄更為妥協至於趙北口以西淀池事  
務既有雄縣新安兩縣縣丞分管北岸又有安州  
州判任邱縣主簿分管南岸其新設之霸州吏目

無庸令其兼理趙北口以西淀池事務可也以上  
該督請添管河各官共三十員除苑家口通判文  
安縣縣丞不准添設永定河北岸同知不准復設  
外天津道局添設州同主簿共二員永定道局添  
設州判縣丞主簿吏目共十六員通水道局添設  
同知通判州判縣丞主簿共八員清河道局添設  
吏目一員通共添設同知以下河官二十七員應  
如該督所請俟奉

旨准設之日在於水利營田衙門効力人員之內將諸  
練河務出力勤慎著有勞績之員揀選補用庶幾  
駕輕就熟可收得人之效至於該督所稱河員到  
任一年之後考驗題請實授等語查効力人員今  
歲一年業已盡瘁河干若補用之後再試一年始  
行實授未免稽遲歲月難以鼓舞人心俟應將通  
河効力人員細加考核錢糧果無浮冒工程果能  
堅固者容臣等量材補用移咨該督仍令該督將

各員到任日期報部與舊設河員一體論俸陞轉  
若有勤敏出格之員容臣等具奏請

旨定奪庶激勸既行而人心益奮矣所有該督疏稱新  
設四道相應換給天津河道關防通永河道關防  
永定河道關防清河道關防新設北運河同知通  
判亦應飭給北運河同知關防北運河通判關防  
並州同以下管河各員無庸鑄給之處以及清河  
道移駐保定府暫住理事通判衙門新設河員與



舊設河員向無衙署者照永定河筆帖式之例每  
員歲給房舍銀十六兩並新設河員應用書役應  
支俸工查照現在同知通判州同州判縣丞主簿  
吏目定例開支之處應如該督所請統候

命下之日行文該督遵奉施行其應給關防移咨禮部  
照該督所擬字樣鑄給其舊有關防俟新鑄關防  
頒發到日令其送部銷燬可也謹

奏雍正四年十月二十日奉

旨議得好著照所議行該部知道欽此

雍正四年十月 和碩怡賢親王大學士朱軾

奏為敬陳各工告竣情形等事竊臣等欽奉

聖謨查修直隸水利舉從前未有之事圖萬世永賴之  
功規畫固貴於萬全而營治必求夫先務是以於  
三四月積水消涸之時派員領帑擇其大且急  
者次第興修雖麥汛早來不無稍妨工作而旋長  
旋消為時無幾加以

天心助順少雨多晴以故人力獲施衆心齊奮各處工程  
頗有就緒而黍稌杭稻之獲以有秋此皆我

皇上至誠感格錫福兆民故水利方興休徵立應非臣  
等愚昧所能意及者也謹將各工告竣情形為

皇上陳之一白衛二河漕運所經最為緊要臣等

奏請疏通磚河興濟築減水壩以洩衛河之漲又於  
靜海縣權家口衝決之處逐段開疏由白塘河歸  
入海河部覆奉

旨依議欽遵在案今已委員挑挖磚河興濟河皆自岐  
口入海雖石壩未成而衛河伏汛驟長丈餘賴有  
新河宣洩得免泛溢之患糧艘安行抵通頗早權  
家口開挖十餘里至積水而止俟水涸之日方可  
施工其沿河隄岸舊有低薄坍塌之處飭令効力  
人員逐處堵築搶護不致沖決成災白河性善淤  
刷飭令通永河道高鑛加謹防護牛鈕所修舊工  
俱令加築堅固以故山漲暴下隄岸無虞一東西

二淀統滙衆流 臣等

奏請多開引河加修趙北口橋隄疏濬中亭十望並  
蘓橋之三岔舊河部覆奉

旨依議欽遵在案今西淀之趙北口隄身俱已堅築如  
式舊橋八座陞高加濶並新添木橋一座皆可指  
日告成廣惠等橋下三河亦均加疏濬惟是白溝  
之流由大灣口而入柴伙淀者水挾流沙旋挖旋  
淤容於水涸之後細加相度改道舊流不惟一方

永逸而柴火淀四十里之間皆為營田之地矣東  
淀之中亭河開濬通流其下流之勝芳河亦挑挖  
深暢三岔經流導自張家嘴而北不令侵逼長隄  
其淀內支河如石溝臺頭一帶淤阻之處俱經浚  
治故汎水雖大隄岸不患衝刷消落迅疾早於去  
秋者兩月中亭河岸涸出田畝一千餘頃晚麥秋  
菜尚未失時其餘皆已深耕以待來春種麥惟十  
望河故道積潦猶存興工有待一子牙河臣等

奏請自主家口分流之處障其西流約束歸一又尋  
求清河夾河月河等故道開決分注以緩奔放之  
勢部覆奉

旨依議欽遵在案今再四查勘清河夾河月河故道久  
湮難以開決而王家口以下至黃岔又分二支雖  
盡行障塞使之東歸獨流大坑然下流轉入揚芬  
港仍苦淤塞終非久計臣等別有規畫另摺具

奏一永定河壅淤清河臣等面奉

聖諭引渾河別由一道入海臣等欽遵相度請自柳岔  
以下導之北流遶王慶坨而東隨復細加籌度猶  
恐水勢拗折宣洩未順委令永定河道明壽自武  
家莊挑引入王慶坨北之長洵河又慮河身淺窄  
難以合流委令筆帖式布納等開擴深廣其郭家  
務以下兩岸隄偏窄之處亦令明壽擴隄改流今  
隄工已成新河將次告竣從此淀河無聞淤之害  
清流得朝宗之路矣一



欽隄一道迴環千里乃數十州縣生民田廬之保障也

歲久傾圮奉

旨命臣等修築自保定之清苑至河間之獻縣派委人員逐段分修六月間汎水驟至飛檄各員并力搶護舊有漫口一并堵築荷蒙

皇恩得免疎虞其安州新安霸州文安一帶隄工兩面皆水尤為險要夫役撈取泥堡尺積寸累工力維艱所幸三伏晴霽入秋暄暖得及時完工數百里

內禾黍杭稻盡獲收穫一

畿南諸府臣等奉

命查勘所有情形已繕摺具

奏部覆奉

旨依議欽遵在案但時已入夏麥汛將來各處工程俱未領帑興修惟南北二泊水口淤塞正順廣大諸河宣洩無路有不可以一日緩者是以臣等先委人員將南北之穆家口淤河四十里疏濬寬深

並修築橋隄以防漫溢而任縣隆平始有寧宇矣  
北泊之黃兕營營上等村大加展挖使泊水暢流  
入滏二泊迭相傳送積滂漸消雖雨水稍多並無  
旁溢之患至滹沱一河遷徙靡定去年決州頭而  
東東鹿深州皆被其害官民環訴望救孔亟雖難  
驟言永圖亦須權為補救已委員於第四溝開引  
導入木邱尋躡舊河由焦岡而注之滏水東鹿之  
間可無衝壓矣一京東州縣工程甚多臣等歷勘

奏請部覆奉

旨依議欽遵在案今武清縣之鳳河自高各莊分流至  
堠上村而歸故道逐段流濬引入淀池野水藉以  
消涸而武漑沮洳之區盡成沃壤香河縣之牛牧  
屯以上舊無隄堰運河泛溢為災今斜築長隄一  
道以資捍禦不惟香河無運河之患而寶坻亦免  
波及矣寶坻為衆澇所歸通州之窩頭河夏店之  
箭杆河為害尤劇今俱已疏濬分流各依縣治南

北而會於北城門建於蘄運河積漲全消汙萊可  
藝還鄉河源峻流紆屢年冲決今已於劉欽王木  
匠等處最曲之處各開直河俾與舊河分瀉而沿  
河隄岸展濶築堅從此無復衝潰矣灤州之別故  
河疏滌淤沙導自廟山遶城南而入灤水不惟城  
闈無侵齧之患而負郭皆腴田也一營治稻田必  
須次第經理臣等委員於玉田等處率先營治以  
為農民之倡今據各員詳報玉田縣營田七十五

頃遷安縣營田十二頃七十八畝灤州營田十三  
頃五畝薊州營田五十餘頃每畝收稻穀三四石  
不等而民間之聞風興起自行播種者安州則五  
十七頃七十一畝新安則一百一十五頃十一畝  
任邱則一百一十頃二畝保定則三十六頃九十  
九畝霸州大城各二十頃文安則至二百四頃二  
十七畝之多以上稻田共七百一十四頃九十三  
畝此實從前所未見者民心懽慶咸稱

皇恩高厚不惜帑金為之規畫經營遂使積淤之區  
坐獲美利但水在隄內者消涸有時皆求設法留  
水以資灌溉夫直隸之所患者水也去之惟恐不  
速今纔享收穫之利即思為灌溉之利所謂用之  
則利棄之則害者非虛語也臣等現在委員相度  
開渠建閘以備旱澇庶小民長享樂利永戴

皇仁於無既矣以上工程除已經報完者委員稽察確  
核外及興修未竣及尚未動工之處統俟明春催

齊民要術卷十一

督修理所有用過錢糧俟工完造冊奏銷臣等才  
識短淺蒙

皇上委任夙夜兢兢常恐貽誤工程有負

皇上愛養元元之至意惟有勉竭駑鈍悉心經理但直  
屬地方遼濶尚有應行修築之處臣等查明繪

圖進

呈仰懇

皇上指示所有本年修過工程理合



奏

聞並各處所種稻田樣米另摺恭呈

御覽為此謹

奏  
欽奉

上諭

恭錄  
卷首

永定河志卷十一